

**Pemerintah kenakan GST hukumnya harus - Muzakarah Jawatankuasa Fatwa
Astro Awani
April 20, 2015
Oleh Hafiz Marzukhi**

PUTRAJAYA: Hukum bagi pemerintah untuk mengutip cukai seperti Cukai Barangan dan Perkhidmatan (GST) adalah harus.

Walau bagaimanapun, Muzakarah Jawatankuasa Fatwa Kebangsaan pada Oktober tahun lepas menyatakan hukumnya harus selagi terdapat keperluan untuk negara dan rakyat.

Pengerusinya, Tan Sri Dr Abdul Shukor Husin berkata tiada salahnya mengenakan GST sekiranya pelaksanaannya berlandaskan hukum syarak.

"Selagi kerajaan komited dalam melaksanakan syariat Islam dan memastikan cukai yang dikutip adalah untuk kebaikan negara dan rakyat, GST boleh dikenakan," kata beliau.

Mengenai pandangan sesetengah pihak yang menyatakan bahawa keputusan ini bercanggah dengan Islam, Abdul Shukor berkata pandangan tersebut adalah tidak tepat.

"Sekiranya keputusan Muzakarah diteliti, maka jelas keputusan yang dibuat telah diikat dengan parameter syarak untuk memastikan perlaksanaannya adil," tegas Abdul Shukor dalam sidang media di Bangunan Jabatan Kemajuan Islam Malaysia (Jakim) di Putrajaya tengah hari tadi.

Sebelum ini, Dewan Ulama Pas mencabar fatwa yang mengharuskan tindakan kerajaan dalam melaksanakan GST, selain menyifatkan hukum pelaksanaannya sebagai haram.

Ketua Penerangannya, Datuk Dr Mohd Khairuddin Aman Razali at-Takiri dilaporkan berkata, selagi sistem GST tidak membezakan antara golongan kaya dan miskin, ia bercanggah dengan ajaran Islam.

Beliau turut mengakui GST adalah sistem percukaaian terbaik tetapi tidak menepati syarak jika dikenakan kepada semua golongan.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-malaysia/pemerintah-kenakan-gst-hukumnya-harus-muzakarah-jawatankuasa-fatwa-58253>